

### **Naqqiut**

Akissuteqaat 29. marts 2022-imeersoq taarserpaa  
(Naalakkersuisut suliassarfiisa allangortinneqarnerisa malitsigisaanik naqqiisoqarpoq)

**Matumuuna siunnersuutigaara Naalakkersuisut peqquneqassasut Danskít  
Naalakkersuisuinut saaffinneqqullugit Kangaatsiami piaartumik  
politeqarfeqalernissaanik noqqaassuteqaqqullugit**  
(Inatsisartuni ilaasortaqaq Hans Aronsen, Inuit Ataqtigiit)

### **Akissuteqaat**

(Aatsitassanut Inatsisillu Atuutsinneqarnerannut Naalakkersuisoq)

### **Siullermeerneqarnera**

Aalajangiiffigisassatut siunnersuummik massuminnga saaqummiussisimaneranut Hans Aronsen, Inuit Ataqtigiit, Naalakkersuisut qutsavigaat.

2021-imi ukiakkut Københavniimi ataatsimiinnermut atatillugu, sooq Kangaatsiami politeeqarfeqannginnersoq pillugu, allakkatigut oqaatsitigullu, Naalakkersuisut sinnerlugit Naalakkersuisup Naaja Nathanielsenip apeqqt taannarpiaq inatsisunik atuutsitsinnermut ministerimut saqqummiuppaa.

Naak Kangaatsiaq 1986-imiilli illoqarfinngortinneqaraluartoq, Kangaatsiaq sooq politeeqarfeqannginnersoq tassunga atatillugu tupigusuutigalugu Naalakkersuisup Naaja Nathanielsenip taavaa.

Tamatuma siuliani, tamanna pillugu Aaja Chemnitz Larsenimit, folketingimi apeqqtigineqartumut akissummini Kalaallit Nunaanni Politiit massakkut Kangaatsiami najuunermik naammanneranik naliliisimanerat ulloq 1. novembari 2021 Inatsisunik Atuutsitsinnermut ministereqarfiup innersuussutigaa. Massakkumut naleqqiullugu Kangaatsiami pinerluttuliortarnerit sakkortusiartornerat imaluunniit akulikilliartrornerat takuneqarsinnaanngitsoq tassunga atatillugu innersuussutigineqarpoq. Kisianni Kangaatsiap Kalaallit Nunaanni illoqarfinni 17-iusuni kisiartaalluni politiitut ilinniarsimasumik sulisumik sullinneqannginneranut tunngavilersuummik akissut taanna imaqanngilaq.

Tamanna tunngavigalugu nammineq paasinnittaatsini malillugu, illoqarfimmi politiitut ilinniarsimasumik sulisoqarnissaanut pinerluttuliorneq kisimi aalajangiisuuneq ajormat, aamma illoqarfinni pinerluttuliornerup annikilliartrorfiini politeeqarfiit matuneqarnissaat siunertaanngitsoq naatsorsuutigalugu, inatsisunik atuutsitsinnermut ministerimut Naalakkersuisup Naaja Nathanielsenip allaaseraa. Tamatuma peqatigisaanik Kangaatsiami

politiit suliniuteqarnerisa annertusineqarnissaannut periarfissat, kisiannili taamaaliortoqassappat illoqarfinni allani politiit suliniuteqarnerisa annikillinerannik kinguneqannginnissaat pillugit oqaloqatiinnissamik Naalakkersuisut kissaateqarnerat erseqqissaatigineqarpoq.

Folketingimut ilaasortamut Aaja Chemnitz Larsenimut akissuteqaanni Inatsisunik Atuutsitsinermut ministerip tunngavilersuutigaa, kiisalu Kangaatsiami politiit ilinniarsimasumik ataavartumik politeeqartitsinissamik pisariaqartitsineq ima annertussuseqartoq, Kangaatsiami politeeqarfimmik pilersitsinermi ingerlatsinermilu aningaasartuutaasussat taamaaliornikkut iluaqutaasussat naatsorsuutigineqartunit annertunerunissaat politiit ataatsimut nalilerneqarsimasoq ilisimatitsissutigalugu.

Naalakkersuisut naalagaaffeqatigiinni oqartussanut attaveqqaqinnissaat aamma Kangaatsiami politeeqarfimmik pilersitsinissamik kissaatip attatiinnarneqarneranik oqariartuuteqarnissaat Inatsisartut kissaatigippassuk, taamaaliornermi Kalaallit Nunaata sinnerani politiit suliniutaannut sunniuteqannginnissaa Naalakkersuisunit suli ilungersuutigineqassaaq.

Taamatut paasinnillutik Naalakkersuisut siunnersuutip akuersissutigineqarnissaa inassutigaaq.